

MINISTER PAUL CROES:

# 'NOS LO SURPASA E RETO AKI TAMBE'



“UN situacion hopi dificil pa mi famia y mi persona”. Esey tabata e prome mensahe cu Minister drs. Paul Croes a duna, un dia despues cu oficialmente el a bira un sospechoso den caso di soborno, labamento di placa y malversacion di fondo ricibi di permisonan. “Mi tin confianza den nos sistema judicial y cu un trabou obhetivo ta wordo haci”, e mandatario ta sigui bisa.

E noticia aki, nos a tuma for di NoticiaCla, cu aprobacion di su Director Tito Lacle, unda e ta cita Minister Paul Croes, kende a bisa: “Pa no stroba e investigacion andando e mihor opcion ta pa no duna ningun declaracion adicional n’e momentonan aki”. E mandatario ta segura cu e tin tur confianza cu cos lo bay bon pe den e caso fastioso aki.

“Mi kier enfatisa cu nos lo surpasa e reto aki tambe y alabes gradici tur esnan cu na un of otro forma a duna nos sosten den e momentonan aki.”

Paul Croes a finalisa bisando den un declaracion via su abogado di bufete HBN Law, Eline Lotter Homan.

E Minister no ta trahando, pero ta den contacto cu su abogado y ta na cas. For di despues cu e caso a bira conoci, e mandatario a opta pa no traha, aunke no ta conoci si el a dicidi di retira temporalmente di su funcion como Minister, of ta simplemente tumando algun dia pa informa su mes di tur loke ta pasando. Di parti di Gobierno, a mostra cu ta dune su espacio p’e por atende cu su asunto.